

四庫全書

史部

欽定四庫全書

蜀中廣記卷二十三

明 曹學佺 撰

名勝記第二十三

下川東道

夔州府三

達州

州以元微之左遷司馬著名方輿勝覽有勝江亭在州

西三里乃郡守王蕃讀白樂天寄微之詩云達州猶似
勝江州因以名亭也長慶集微之到通州日授館未安
塵壁間有數行字乃是僕十五年前初及第時贈長安
妓阿軟絕句緬思往事杳若夢中懷舊感今因訓長句
呈白居易詩云十五年前似夢遊曾將詩句結風流昔
教紅袖佳人唱今遣青衫司馬愁又見樂天詩云通州
到日日平西江館無人虎印泥忽向破簷殘漏處見君
詩在柱心題其間酬唱甚多未可殫述 當時有李景

信者自長安來訪周旋少日而別焉微之有李十一景
信到詩云何事相逢翻有淚念君緣我到通州留君賸
住君須住我不自由君自由又有丁溪館別景信詩云
京城每與閒人別猶自傷心欲白頭今日別君心更苦
別君緣是在通州 陳昇翠玉軒序通川之境東瀉巴
渠西峙鐵嶺南對夏雲北望鳳山寰宇記云巴渠江在
石鼓縣南四十步流入通州界江中有南昌灘元微之
南昌灘詩云渠江明淨峽逶迤船到名灘拽筴遲櫓窳

動搖妨作夢巴童指點笑吟詩畲餘宿麥黃山腹日背
殘花白水湄物色可憐心莫恨此行都是獨行時 志

云鐵山在州西二十里石色如鐵上有獅子石和尚岩
諸勝蓋迢遞自石城來者山四面絕崖西有一路登頂
寰宇記云後魏廢帝二年開拓山南改宣漢為石城從
山名也 輿地紀勝云翠屏山橫列州南元微之建夏
雲亭其上山北又有水流寺巨石刻成殿形餘址蕪沒
惟佛像屹立江邊 寰宇記云鳳凰山在通川縣北五

里山形鳳翅掩映州城有梧桐坪寶芝洞諸勝洞中石
乳成峰玲瓏如刻鏤又有砥石縱橫丈餘鑿為曲道可
以流觴志云鳳山有呂公壘相傳呂純陽幻形乞食寺
僧知而蹤跡之遂雲影冉冉逝矣 輿地碑目漢車騎
將軍馮緄碑在永睦縣之西八十里緄薨於桓帝之永
康元年文尚瞭然可讀其父煥亦有兩碑斷裂不全僅
存大槩又云有漢廣漢蜀國侯李翊及蜀國侯夫人墓
銘翊以靈帝熹平二年卒夫人不著姓氏疑其為臧字

首尾亦不刊缺又云書字巖碑在巴渠縣西十里多斷
缺不成文理間存晉昌太守字按晉孝武方立晉昌郡
則此必東晉以後人碑耳又云唐處士墓碑在州城北
十五里楊斗壩馬腦鼻山下乃唐景龍二年刻字畫道
媚如歐柳可愛又云元稹告畬三陽神文元和志載在
通川縣之華陽觀又云廣福院修福殿記在永睦縣即
唐福田寺有會昌三年王欽說修福殿記又云瀘潭院
鐫佛記在通川縣東富教里岸側石上乃唐人所鐫傍

有中和造像人姓名百餘字多漫滅又有黃山谷贈通川令韓廣叔碑文廣叔赴通川日魯直以言贈之曰惟勤能辦公家惟清能律貪吏嚴而信則吏不病民簡而敏則民多在野又有趙節婦碑節婦姓趙氏娶居有兒人欲犯之脅以白刃節婦不為動既而誘以百端終不可遂刺殺之時皇祐二年知州薛侁憇其節為之立碑於達州之西北山上後邑令薛仲侃勅祠繪像於中

東鄉縣

治南有石鼓橫江上為石鼓鎮楚春申君之花果園也
寰宇記云唐析石鼓縣之西鄉地在東關水北五十步
置巴渠縣紀勝云舊巴渠縣後鹿子山漢樊噲嘗屯兵
于此四夷述云唐武德中移東鄉縣治於今縣東一里
安養故城 寰宇記云萬戶溪在巴渠縣東八十里自
開州萬壽縣界北流來合縣溉江水又有成熟溪亦自
開州萬歲縣來合文字溪紀勝云西北四十里崖壁間
懸二石左類日右類月月中空隙有娑羅樹一株

太平縣

舊明通縣地也勝覽云丙穴在明通縣井峽中其穴凡十其中皆產嘉魚春社之前魚即出穴秋社旋歸其出也止于巴渠龍脊灘首有黑點謂照映星象相感而成長身細鱗肉白如玉其味自鹹蓋食鹽泉也紀勝云

太平東七里有龍潭羣峰環拱凡七十二浦會合凡四十八渚而匯為潭廣餘百畝其深叵測寔惟龍湫又云東北八十里萬頃池是春申君故居旁有平田萬頃鄰

邑諸水源皆出于此

新寧縣

寰宇記云故新寧城在縣西北十里後魏恭帝二年於此立縣隋開皇三年廢唐武德二年又置後遷於賓城通志云宋更為三岡縣至道中移治於新安市元至元初復稱新寧矣紀勝云新寧南十里有黃茅嶺即古詩所稱猿聲時下斷月色好平看也

梁山縣

邑名高梁又曰都梁皆因山也寰宇記云高梁大山在縣北四十里尋江源記云高梁山東尾跨江西首劍閣東西數千里山嶺長峻其峰崔嵬於蜀市望之若長雲垂天一日行之乃極其頂俯視衆山泯若平原劍閣銘所謂巖巖梁山積石峩峩者也張文琮蜀道難詩梁山鎮地險積石阻雲端矣輿地紀勝云都梁又名高都在縣治北十五里舊有高都驛乃天寶進荔枝之路也山壤腴而黃其民多業種薑寰宇記云本漢朐腮地也

後魏廢帝分朐腮置魚泉縣今縣即魚泉縣地以丙穴
嘉魚為名尋江源記云丙穴有嘉魚其味甚美水出栢
枝山在縣東南十五里是也方輿勝覽云五代偽蜀在
今軍治置務曰石氏屯田務宋開寶初土豪石處贊納
庄田八所遂廢田務移縣於此因陞為軍劉煥題名序
稻田蕃腴常多豐年矣紀勝云垂雲樓在子城之北
左瞰萬石右倚東山景物奇麗峽中未有又有瑞豐亭
陸務觀詩峽中地偏常苦貧政令愈簡民愈淳本來無

事只畏擾擾者才更非庸人都梁之人猶無苦須晴得
晴雨得雨父老羅拜豐年賜縱產芝房非上瑞 勝覽
云峰門山在軍東十五里其山高頂有寒泉兩岸對
峙如門也 又云蟠龍山在城東二十里孤峙秀傑突
出衆山之上下有二洞洞有二石龍狀首尾相蟠故名
旁曰噴霧岩洞中之泉下注垂崖約二百餘丈噴薄如
霧張無盡留題云水味甘腴偏宜煮茗非陸羽莫能辨
范石湖以為天下瀑布第一有飛練亭與之相對舊取

徐凝詩句東坡以為惡乃易名飛雪亭取歐陽公所稱
六月飛雪灑石砭矣魏了翁飛雪亭詩云自荆入蜀路
險絕黑猿聲中膽欲折萬州江頭舍舟楫又趣擔簦窮
巖壑危磴連雲如積鐵亂石砭足十九跌僕夫流汗馬
止舌遙望蟠龍掛天脇懸瀑落巖噴霏屑中間有亭曰
飛雪十里陰風寒入髮人言此地無六月呼取大斗酌
甘潔一飲令君消內熱予以壬子歲再過此作詩云春
水三年別寒聲十里聞鶯花流出洞樹石掛成文有意

同高潔無心作使君前車行度險予且坐斜曛按蟠龍
洞古碑云張卞為蜀將先主攻固陵諫不聽乃入山修
真遇樵叟自稱鳩夷人授之丹訣得道矣 碑目又云

舊梁山驛碑在軍東四十里耆舊相傳李唐時有白虎
蛟龍為民害民至遷居以避韓昌黎嘗按部經行二害
乃去作碑識之今名其地為碑坳碑猶存于溪側字漫
滅不可復識又有唐碑題云令長新誠之記乃明皇御
製梁山令尹茂元得於萬州守河東裴公而刻之蓋大

中十年也嘉定丁卯郡守李錫移於軍治其詞云我求
令長保乂下民民之不安必有所因侵漁寢廣賦役不
均使夫離散莫保其身徵諸善理寄爾良臣與之革故
政在維新調風變俗背偽歸真教化為先惠卹於貧無
小無大必躬必親青旌勸農孰不攸遵曷云被之我澤
如春此碑原在舊驛中 勝覽云書院峽在軍東五十

里峽石市之北每風雨冥冥如聞讀書聲故其中有夫
子崖子貢壩峽下有坐卧石塔按夫子子貢韓退之皆

未嘗至蜀此必附會之說也

勝覽云寒泉洞在軍之

西龍鎮十里許有洞曰寒泉

紀勝云軍西二十里赤

牛山覺林院之東有一石龕琢石為大悲像四十二手

皆有所執碑目云赤牛城有石刻淳祐二年上元落成

週三百六十步敵樓百四十三座四門各有廢刻堽壙

將臺各基址猶存

紀勝又云縣西五十里多喜山時

有神光現見之多獲喜事故名陳希夷曾居此丹爐石

枕俱存有雌雄泉春夏左盈右竭秋冬左竭右盈古誌

識云東有飛龍西有赤牛文必拜相武必封侯按飛龍
即蟠龍山赤牛即牛頭寨也宋張無盡拜相漢張卞至
唐時始封廣澤侯矣 紀勝又云金鳳山拒軍西五十
里楊市之北其山之南半崖有罅邃然內皆洞明其石
上有若圖仙女狀面貌儼然時若動搖迫而視之則不
見 又云軍西七十里落雲潭常有雲覆其上他日漁
者拋網得一石老君自此不復有雲氣像在永安市民
冉氏園中背有字曰天漢二年刻也 寰宇記云石瓦

山在縣西百一十三里山巔有古人礪刀劍亂石如積瓦馬紀勝云瓦城山在軍西百二十里圖經亦曰石瓦山山下有古欄楯蹤迹屈曲至于山上其巔平坦耕者往往得古銅片 紀勝又云軍西百四十里筆山即白

雲山也奇峰如筆故云宋張無盡詩白雲山上揖世尊各以願力濟羣生即此予以萬曆己酉歲登峰上即別寄題詩云似筆挺然秀山川亦好文宕渠花裏出秦嶺竹間分石臼生春水香龕積暮雲經過難久住日後覺離

羣壬子歲再過此作詩云霧到此中止分明要客登水
田開四野松石閑孤僧步入禪鐘慣詩題綵筆曾稍紆
行役苦惟有勝緣能 寰宇記有逢溪山云在縣南八
十步水西南流入忠州桂溪縣界 通川志 閬 浮蘭碑

載梁山軍忠州兩界舊有漢刻石署白虎夷王姓名今
其上刻漢時官屬及白虎夷王及時民等姓名尚有可
攷碑目云五大夫碑在梁山軍界上字雖漫滅然乃漢
隸也 夷堅雜錄云梁山有漢武帝祠至今祭時往往

有一二百蝴蝶降祠所享其食近之不驚徹饌然後羣
去時謂武帝侍從捉之者必致病按常璩云益州刺史
毀蜀中山川神祠取其松柏為舟船惟不毀漢武帝祠
則蜀之祠武帝久矣 紀勝云梁山呂保藏家高崖峭
絕半腹有一穴漢赤眉之亂邑人呂保藏家賢巨萬鑿
石以居冠不能近後舉家隱焉宋紹熙中有樵夫得一
券於崖側非銅非鐵其聲鏘然上有古篆云西漢之末
赤眉邂逅黃金千兩坑埋而走羔豚十祭其財自阜今

藏所猶存

萬縣

華陽國志巴東郡南浦縣在郡南三百里晉初置主夷
又云晉武帝平吳之後巴東省羊渠置南浦按南浦在
縣南岸蜀志建安二十一年先主分朐胝之東南界立
當縣故其西四里天子城相傳昭烈駐兵于此常璩所
云小石城是也三面峭壁惟山後長延一脊容徑尺許
累石為門矣 羊渠漢縣也通志云萬縣西五十里羊

飛山相傳有道人令童子牧羊戒使勿放一日童子放之其羊冲天而去按蜀鑑羊飛山下有羊渠縣即此

縣南百二十里又有廢武寧縣後周建德所立唐王周過武寧縣詩云行過武寧縣初晴物景和岸迴驚水急山淺見天多細草濃藍濛輕烟匹練拖晚來何處宿一笛起漁歌輿地紀勝云武寧縣西一里許旌陽舊宅即今之白鶴寺也宋大章未嘗讀神仙傳疑而不信新都宰張澤語之曰許遜本潭人曾任蜀之旌陽令雅顧

此山因有別業亦何疑乎 一統志載萬縣西百里有木樨山昔大禹治水過此見衆山漂沒惟此山木樨不動故名寰宇記云在武寧縣東南十三里山頂有池淺深隨江水漲減以地里合之是矣樂史又云石笋山在縣東北三十五里其狀如笋舟過漕溪瀼塗之間見之恟目焉 水經曰江水又東逕瀼塗而歷胡灘又東逕界壇註云是地巴東之西界益州之東界也按瀼塗驛在當縣南六十里江中有石似胡人名曰胡灘飛瀑湍

流其勢險急杜少陵詩不是怕胡灘者此矣亦今上下
川東之界也 經云江水又東南會北集渠註云二溪
水涪陵縣界謂之于陽溪北流逕巴東郡之南浦僑縣
西溪夾側鹽井三口相去各數十步以木為桶徑五尺
修煮不絕水北流注於江謂之南集渠口亦曰于陽溪
口北水出新浦縣北高梁山分溪南水逕其縣西又南
一百里入朐腮縣南入于江謂之北集渠口別名班口
又曰分水口朐腮尉治此按分水驛在當縣西南八十

里此水由天生橋而出方輿勝覽云天生橋在州西苕溪上乃一巨石自然成橋長與溪等平濶如履平地溪流出其下矣 經云江水又東逕石龍註云水至于博陽二村之間有盤石廣四百丈長六里而復殆于岨塞江川夏沒冬出基亘通渚按即縣西之盤龍磧也江岸中有黃金沱蛾眉磧古練石皆以形似得名碑目云隋朝寶像記在古練岩矣 陳子昂萬州曉發放舟乘漲還寄蜀中親朋詩空濛巖雨霽爛熳曉雲歸嘯旅乘明

發奔橈驚斷磯蒼茫林岫轉絡繹漲濤飛遠岸孤烟出
遙峰曙日微前瞻未能賔坐望已相依曲直多今古經
過失是非還期方浩浩征駟日駢駢寄謝千金子江海
事多違王周萬州公居詩公居門館靜旅寄萬州城山
共秋烟紫霜并夜月清無愁千酒律有句入詩評何必
須林下方馳吏隱名劉長卿寄萬州崔使君令欽詩時
艱方用武儒者任浮沈搖落秋江暮憐君巴峽深王門
多白首蜀郡滿青襟自解書生詠愁猿莫夜吟鄭谷寄

南浦謫官詩多才翻得罪天末抱窮憂白首為遷客青
山遶萬州醉疑梅嶂曉歌壓竹枝秋望闕懷鄉淚荆江
水共流范成大萬州詩晨炊維下巖晚酌艤南浦波心
照州榜雲脚響衙鼓前山如屏牆得得正當戶西江朝
宗來循屏復東去官曹倚巖樓市井喚船渡瓦屋仄石
磴猿啼聞人語剔核杏餘酸連枝茶贖苦窮鄉固瘠薄
陋俗亦寒窶營營謀食艱寂寂懷輒訴昔聞吏隱名今識
吏隱處自注云此萬州之實境非親到者不知其語之

工也 紀勝云縣西有太白宮在西山上即絕塵龕也
碑目云絕塵龕三字在西山石壁字體清勁類晉宋間
人書有唐人詩刻相傳以太白讀書于此岩下有池宋
郡守馬元穎曾有開所鑿廣一畝植以芙蓉荔枝雜果
凡三百本有勒封院黃魯直記云庭堅蒙恩東歸道出
南浦太守高仲本置酒西山寔與其從事譚處道俱來
西山者由郡西渡大壑稍陟山半松柏蒼翳水泉渚為
太湖亭榭環之有僧舍五區其都名曰勒封院樓觀重

複出沒烟霏之間而光影在水邦之人歲脩禊事於此
凡夔州一道東望大壑西盡郛林泉之勝莫與南浦
爭長者也寺僧文照喜事作東西二堂於茂林脩竹之
間仲本以為不奢不陋冬燠而夏涼宜於遊觀也建中
靖國元年二月辛酉江西黃魯直題張俞宴萬州西山
池亭東魯使君詩西嶺鬱盤紆寒泉注原隰下有垂龍
池何年此殊極復為鼉鼉據亂我清泉水色松幹已交摧
石牙空鬬立魯侯獨窮勝無事日尋陟蕩滌潢汙流宛

如疏鑿力池光復涵澈萬象皆鏡入亭觀出浮雲彤彤
映邦域左右浮屠宮歸然爭案岌昔乃荆棘荒今為蕙
蘭襲密樹低華陰嘉禽弄文翼使君池上宴何減襄陽
習又題西山臨江亭詩南浦逢除日天涯有去舟蠻城
和雨閉峽水帶春流不負新年感惟多故國愁寧無賀
春酒徒此事羈囚 勝覽云岑公洞在大江之南廣六
十餘丈深四十餘丈石岩盤結如華蓋左右方池有泉
湧出巖簷遇盛夏注水如簾松篁藤蘿鬱蔥蒼翠真神

仙窟也圖經云岑公名道願本江陵人隋末避地隱此
岩下百餘歲肌膚若冰雪積二十年尸解去碑目云岑
先生銘唐嚴挺之撰開元二年立又有段文昌銘貞元
三年四月十五日鐫唐刺史馬冉詩云南溪有仙澗咫
尺非人間泠泠松風下日暮空蒼山宋趙善贛詩真人
邈何之恍忽不可見洞居獨嵌空壁涵明珠濺藤蘿含
溟濛竹栢鬬蔥蒨至幽合人心遠翠落江面野老乘藍
輿使君肆清燕日影砌下倒雲谷坐間變大木岩欲傾

邃磴路微轉崢嶸施屏風照綴成彩綯雖云急行樂勝
賞殆亦遍欲歸重盤旋拂石看古篆郭印詩岑公來避
世甲子十周年夏屋虛岩豁神芝結藥懸木喬從古種
杳杳至今傳學道能堅忍何人不得仙宋徽宗政和五
年四月二十一日幸徐常廬因念逾期未歸信筆立成
一絕可知常詳茲眷意庶速西上也詩云人生何事厭
鷺塵汎宅浮家冬復春今日暫來猿鶴語他年應召白
雲人黃庭堅建中靖國元年三月萬守高仲本宿約遊

岑公洞夜雨達旦戲贈二小詩云肩輿欲到岑公洞正
怯衝泥傍險行應是岑公閤清境春江一夜雨連明又
蓬窻高枕雨如澠恰似糟牀壓酒聲今日岑公不能飲
吾儕強健可頻傾范仲黼詩石壁虛涵雲氣深水簾蔽
藪墮瑯琳客來但愛幽棲好誰識岑公萬古心趙希混
詩自有烟雲護石扉更深曉色近清暉岩前老檜吟風
處似請仙翁化鶴歸 碑目云萬州虛鑒真人贊朝請
大夫知襄州軍州兼管内勸農事提舉房隨郢州兵馬

巡檢公事柱國借紫岑象求撰文陽翟李廌書丹南京
進士戚遠題額奉議郎權知萬州軍州兼管內勸農事
武騎尉賜緋借紫蓋休景立石于元符元年又云宣和
中道君皇帝御書萬州妙庭觀岑洞碑紹興二十八年
二月朔右朝請大夫權發遣萬州軍州主管學事兼管
內勸農借紫臣李莘民述記冲妙大師前勅差克萬州
道正主管教門公事賜紫臣冉通明立石已上諸碑予
以癸丑歲二月歸舟遍訪而搨之 圖經云峽中漢刻

少今萬州報恩寺有碑高五尺乃漢桓帝延熹間所刻
石凡百餘字土人謂之宜子碑 紀勝云西南三里壽
寧觀有唐太宗明皇銅真像治北集虛觀有唐垂拱時
碑 碑目云萬利廟碑乾德乙丑白廷誨為刺史重修
距今二百三十餘年漫滅不可讀又云白刺史題名記
開寶二年九月記同時僚佐姓名在州萬利廟有碑什
草莽中考閱得之字皆漫滅獨白刺史名在 碑目又
云大雲寺碑有唐僧圓澤傳及元和間萬州守李裁書

聖業院碑在周溪大江之濱三生石旁蘚封可見者咸
通三年壬子歲十一月建十餘字耳按周溪在縣東四
十里忠義傳載李源道人再生事詩云三生石上舊精
魂賞月吟風不要論慚愧情人遠相訪此身雖異性常
存又身前身後事茫茫欲話因緣恐斷腸吳越山川尋
已遍却迴烟棹上瞿唐冷齋夜話云此僧贊寧所記東
坡以為即圓澤也 經云江水又東彭水注之註云水
出巴渠郡獠中東南流逕漢豐縣東清水注之水道源

出西北巴渠縣東北巴嶺南獠中即巴渠水也西南流
至其縣又西入峽檀井溪水出焉又西過山至漢豐縣
東而西注彭溪謂之清水口彭溪又入涇胸縣西六
十里南流至于江謂之彭溪口按在縣東八十里巴陽
驛是俗名小江舊小彭驛設馬紀勝云小彭驛邊有二
石虎高五尺各有四翅石刻詩云巍巍二虎一塵埋巨
石鑄成尚有痕只此也須防夜箭灞陵恐遇李將軍蓋一
尉題俗稱石麒麟云

雲陽縣

經云江水又東右逕胸臆縣故城南註引常璩曰縣在巴東郡西二百九十里縣治故城跨其山阪南臨大江之南岸有方山山形方峭枕側江濱矣輿地紀勝胸臆城本漢縣在萬戶城西固陵集載李燾胸臆記云余泊舟雲安之西三十里萬戶驛下橫石灘上土人云今驛之左右則胸臆故城也仁父又有曲水畱題云或言雲安之西三十里許有自然曲水閏月甲午朔泊舟橫石

灘上攜子屋坐塾壁望及劉甥卞子道子步訪之水
極浚急不可流觴岩巔有永和三年及六年刻字十五
六行剝落已不可讀細辨其文但昔人捐金以事仙佛
識金數于石耳殆非禊飲處也好事者因年號遂增飾
之當時必置屋廬像設今變滅無餘然水石要可喜取
酒酌其旁賞晤良久乃去輿地碑目云夔州守楊輔去
官過萬戶驛故胸臆縣治泊舟游古書岩見刻石滿其
上意當時或有像設屋室蓋縣人常所往來之地縣徙

歲月不復可考而石刻亦漫闕就盡說者但為臆創乃屬雲安大夫劉甲徧摹岩上下石刻試考詳之庶幾其猶有獲也同來者雲安大夫鄭邦基郝奚仲從姪有聲淳熙十五年八月十六日按橫石灘今之橫梁候館設馬萬戶驛即萬戶壩去縣西四十里萬戶驛北有漢城山乃漢扶嘉所居按扶嘉胸臆人也初嘉母於湯溪側遇龍後生嘉巧發奇中高祖為漢王與嘉相遇獻定三秦策高祖以其志在扶翊賜姓扶氏為廷尉臨終有

言云三牛對馬嶺不出貴人出鹽井按馬嶺在縣北三十里三牛在縣北二十里皆近鹽井監矣 經云江水又逕魚復縣之故陵註云舊郡治故陵溪西二里之故陵村溪即永谷也地多木瓜樹有子大如甌白黃實甚芬香爾雅之所謂楸也經云江水又東為落牛灘逕故陵北註云江側有六大墳庾仲雍曰楚都丹陽所葬亦猶枳之巴陵矣故以故陵為名也有魚復尉戍此江之左岸有巴鄉村村人善釀故俗稱巴鄉清郡出名酒村

側有溪溪中多靈壽木中有魚其頭似羊豐肉少骨美
於餘魚溪水伏流逕平頭山內通南浦故縣陂湖其地
平曠有湖澤中有菱芡鯽鴈不異外江凡此等物入峽
所無按故陵者即古陵沱也酈道元以為舊郡治今名
舊縣壩矣碑目云漢處士金廣延母子碑初無文字但
有人物又有一碑所勒皆車馬人物或云古者修車馬
備器械之圖此皆在舊雲安郡也 寰宇記云使君灘
在軍東二里大江中昔楊亮為益州至此舟覆徵其波

瀾蜀人至今猶名之為使君灘一曰博望灘荊州記云
張騫奉使西域於此覆舟亦名使君灘乃在今縣之西
矣江中又有龍脊灘形如遊龍歲人日邑人遊於上
以雞子卜歲豐凶古謠云龍床如拭濟舟必吉龍床彷彿
濟舟必沒宋馮時行龍脊灘留題云建炎戊申正月
上巳日判官李造道司戶趙執權知縣母邱元望縣尉
馮當可陪郡侯謁武烈公祠遂泛江而下散步此磧老
杜詩云元日至人日未有不陰時議者謂天寶之季此

詩盡之今日天宇清明江國熙然太平之期指日可俟
又獲與諸公偕遊所謂人日也馮當可書 杜詩東城
抱春岑江閣鄰石面崔嵬晨雲白朝旭射芳甸唐詩有
硤斷見孤邑江流照飛甍暮色四山起愁斷數猿聲皆
雲安景象 元和志郡有鹽官橋官今五峰驛前有橋
官堂也宋李臺雲安橋官堂記云建炎中改軍為縣隸
于夔猶存使名官儀仍備太守之畧而時節得以奏章
自達於朝他邑莫比焉治內有杜鵑亭杜詩雲安有杜

鷓鴣名本於此杜詩又曰峽裏雲安縣江樓翼瓦齊兩邊
山木合終日子規啼按杜鷓鴣子規本一鳥蜀本紀以為
望帝所化詳在方物中予過雲陽題杜鷓鴣亭詩云春林
血淚染山青羈客中宵忍淚聽何處蜀山不啼遍雲安
偏有杜鷓鴣亭又過雲安絕句之三云也是山青水碧時
客懷何事動深悲春林三月無行迹君未前來聽子規
蓋兩用之方輿勝覽云飛鳳山與縣治相對古刻鳳
凰崑三字瀑布泉出焉注于白玉池產太乙玄精石按

張桓侯祠設在此山之脊馮當可所稱武烈祠也有石
如杵黝而澤設在案前即玄精石矣 經云江水又逕
東陽灘註云江上有破石故亦通謂破石灘荀延光沒
處也常璩曰水道有東陽下瞿數灘山有大小石城靈
壽木及橘圃也水經註曰江水過下瞿灘左則陽溪水
注之水源出縣北六百餘里上庸界南流歷縣翼帶鹽
井一百所巴川資以自給粒大者方寸中央隆起形如
張傘故因名之曰傘子鹽有不成者形亦必方異於常

鹽王隱晉書地道記曰入湯口四十三里有石煮以為
鹽大者如升小者如拳煮之水竭鹽成蓋蜀火井之倫
水火相得乃佳耳湯溪下與檀溪水合上承巴渠水巴
渠南歷檀井溪檀井入湯水湯水又南入于江名曰湯
口也 唐商真君飛昇記云雲安風俗淳厚陶染真風
如瞿法言楊雲外之徒繼出故琳宮秘館獨盛他處興
地紀勝云棲霞觀舊名昇雲宮在縣北一十里宮據山
絕頂下瞰羣峰培塿可數唐瞿法言于此脩煉白日仙

去巨栢參天皆二仙手植殿左有五龍池能興雲致雨
碑目云唐雲外尊師碑在雲昇宮杜光庭文見九域志
今名樓霞宮又曰縣西四十里集靈觀有碑云象山福
地玉華仙館唐商真君飛昇之所 又曰縣西百里有
上下岩黃魯直云唐未有劉道者聞道于雲居膺禪師
為開岩第一祖法號道微自鑿石龕曰死便藏龕中不
用日時門人奉其命二百年來遊者題詩不可勝讀莫
能起此開岩者故予作詩表見之云空岩靜發鐘磬響

古木倒掛藤蘿昏莫道蒼苔鎖靈骨時應持鉢到諸村
又云寺古松楠老巖虛塔廟開僧緣蠶麥去官放荔枝
來石室無心骨金鋪稱意苔若為劉道者拽得鼻頭回
自注云其一用楊子安韻一用王定國韻也按下巖即
燕子龕見郭信可詩矣王維贈鷲子龕禪師云山中燕
子龕路劇羊腸惡裂地競盤屈挿天多峭崿瀑泉吼而
噴怪石看欲落伯禹訪未知五丁愁不鑿上人無生緣
生長居紫閣六時自搥磬一飲尚帶索種田燒白雲斫

漆響丹壑行隨拾栗猿歸對巢松鶴時許山神請偶逢
洞仙博救世多慈悲即心無行作周商倦積阻蜀物多
淹泊巖腹乍旁穿澗唇時外拓橋因倒樹架柵值垂藤
縛鳥道悉已平龍宮為之涸跳波誰揭厲絕壁免捫摸
山木日陰陰結跣歸舊林一向石門裏任君春草深郭
印題雲安下岩云地涉雲安境山名燕子龕簾垂看急
溜蓋偃得修楠牢落前賢蹟光明有佛菴幽禽知客至
一一解玄談趙抃過雲安軍下巖僧舍云幽寺倚巖阿

雲扉掩薜蘿老僧中燕息誰問世風波喻汝礪雲安下
巖次涪翁韻云徑向山腰轉門從水面開片雲巖下宿
一鉢朔方來落日鳥衝樹輕陰花覆苔惟應荔枝熟時
躡白雲回又路暗松杉密天空霧雨開山容依檻轉鳥
影度江來汲水僧歸寺銜花鹿印苔年年蠶麥熟貧道
輟齋回宋肇題下巖云古寺依叢壑雲深暗薜蘿山僧
眉睫異林鳥語聲和絕壁疑無路長江忽自波暫來還
趣駕衰早倦經過又下巖逢雨云地險重樓仄巖虛古

殿開泉鳴風處瀨石暗雨邊苔黃葉曾攀柳青梢未折
梅居僧因解笑歲晚尚西來又嵐光分碧瓦江影動丹
扉林鳥拳晴竹沙鷗印夕霏風幡空自舞雲岫幾時歸
石室君無問塵埃萬事非又盡把蕭疎鬢難勝浩蕩愁
西風吹落日小雨弄殘秋堙沒千山瘴掀騰萬壑流宦
途如客路吾意轉悠悠黃人傑題云十月水痕瘦維舟
過下巖鷗行沙作路龍像石為龕風定烟光合霜回日
色酣賦詩無好語聊用志瞿曇李燾和黃豫章韻云山

與蜀江並富從天漢開禪僧若個住詩客幾人來金闕
掛白練石龕封綠苔攜家便堪隱歸櫂重徘徊宋永孚
詩云江漲桃花後風薰荔子前來瞻千億佛去此十三
年富涵翠常滴林花紅欲然因知山與石本性亦虛圓
又兩山中斷曉天開萬頃無波浸綠醅巖外水簾垂到
地坐看烟雨過江來楊邁下巖詩云竹樹藤蘿密復疎
路迴崖斷見精廬龕藏衲子千年骨神護涪翁半壁書
落日紅光浮戶牖曉雲空翠滴衣裾塵勞獨愧山僧靜

一飯跏趺不願餘又下巖避暑云古寺重來興轉添舟
中午暑正炎炎野僧引客登山閣稚子穿雲放水簾熱
得清涼身暫健懶便閒靜意難厭人間劫火方撩亂法
雨何如為普沾令狐慶譽詩云地遠塵寰不染埃懸崖
屈曲寄層臺山頭玉溜隨簷滴巖下金容就石開寺影
不妨流水過松香常逐好風來徧遊未盡無窮景為報
舟人且莫催杜東之詩云濤江翻雪捲胡灘晚泊巖扉
暫解顏風有靜綠逢寺古了無生理伴僧閒殘雲已斷

獨飛雨落日將沉却照山半夜秋聲驚客夢一簾珠貝
冷珊珊閨人朱煥下巖次韻云勝地都無一點埃脩脩
野竹映樓臺僧同巢鳥林端見佛顯靈巖石面開道者
已隨鸞鶴去世人特為水雲來登臨清興無窮盡一下
層巒暮色催 予以萬曆壬子暮春過此作詩云病中
入寺情相得雨後看山興轉添片石僧寮無結構一春
嵩澗自垂簾題名刻像成今古背路臨江恰見潛我已
忘機來此地白雲溪鳥莫猜嫌因遍訪諸石刻其可見

者游仲鴻游季祥來遊時段諫仲適尉此邑邂逅巖中
酌酒共坐而去淳熙乙巳四月十四日也 軍守張吉
監井史澤判官陳奭以嘉祐六年五月二十一日至寺
下偶新蓬州司理向宜顏偕遊 資郡張良能少穎解

褐西泝艤舟來謁尊者拜三先生遺像紹定庚寅仲春
念一日男遠卿侍 杜世東就銓西歸謾書絕句往年

題柱記行色今日支筇還獨來道者相看定相笑若為
牽得鼻頭回 樂溫 缺 鐘涪陵尉鄭階平治平乙未六

月五日同遊住持本院主僧法能刻石

開縣

舊漢豐縣也華陽國志云漢豐縣建安二十一年置在巴東郡西北彭溪源寰宇記云後周改漢豐縣為永寧縣今州西四十九里濁水故城是也志云縣南四十里墊江一名濁水源出梁山縣之高粱山春夏泛漲人多墊溺流至渠口鋪入開江又云清水源出萬歲縣之石塔山西南流經石門山又西南流經巴渠故城東輿地

紀勝云巴渠縣劉宋所置宇文氏改為萬歲縣以縣北有萬歲谷也舊址在今縣東北五十里即宋之清水縣矣縣西北一里有盛山以唐刺史韋處厚著名韓愈作盛山十二詩序云韋侯昔以考功副郎守盛山人謂韋侯美士考功顯曹盛山僻郡奪所宜處納之惡地以枉其才韋侯將怨且不釋矣或曰不然得利則躍躍以喜不得利則戚戚以泣若不可生者豈韋侯之謂哉韋侯讀六藝之文以探周公孔子之意又妙能為辭章可

謂儒者夫儒者之于患難苟非其自取之其拒而不受于懷也若築河隄以障屋雷其容而消之也若水之于海冰之于夏日其翫而忘之以文辭也若奏金石以破蟋蟀之鳴虫飛之聲況一不快于考功盛山一出入息之間哉未幾果有以韋侯十二詩遺余者方且以入谿谷上岩石逐追雲月不足日為事讀而詠歌之令人欲棄百事往而與之遊不知其出于巴東以屬胸臆也于時應而和者凡十人及此年韋侯為中書舍人侍講六經

禁中侯名處厚和者通州元司馬名稹為宰相洋州許
使君名康佐為京兆忠州白使君居易為中書舍人李
使君景儉為諫議大夫黔府嚴中丞武為秘書少監溫
司馬造為起居舍人皆集闕下于是盛山十二詩與其
和者大行于時聯為大卷家有之焉慕而為者將日益
多則分為別卷韋侯俾余題其首云 韋處厚詩激曲
繁飛箭浮溝泛滿卮將來山太守莫向習家池右流杯
渠不資冬日秀為作暑天寒先集誠非鳳來翔定是鸞

右竹岵巉巖雪中嶠磊落標方峭勿謂枕蒼山還當礎
清廟右繡衣石榻註為溫侍御置雨合飛危砌天開卷
曉窻薺平聯郭柳帶繞抱城江右宿雲亭夾岸凝輕素
交枝漾淺淪味調方薦實臘近又先春右梅谿噴日舒
紅錦通蹊茂綠陰終期王母摘不羨武陵深右桃塢疏
鑿徒為巧圓窪自可澄倒花紛錯繡鑑月靜涵冰右葫
蘆沼顧渚吳商絕蒙山蜀信稀千叢因此始含霧紫英
肥右茶嶺繚繞綠雲上璚玢甃玉聯高高層幾折極目

瞰秋鶻右盤石磴褊地堆層疊因厓遂削成淺深嵐嶂
色盡向此中呈右琵琶臺綆汲豈無井顛崖愧深浚願
灑塵垢餘一雨根莖潤右上士瓶泉註為柳律師置初
映鉤如線終銜鏡似鉤遠澄秋水色高倚曉河流右隱
月岫張籍和云獨入千竿裏緣巖踏石層笋頭齊欲出
更不許人登右竹巖曲沼春流滿新蒲映野鵝聞齋朝
飯後拄杖繞行多右葫蘆沼月出深峰裏清涼夏亦寒
每嫌西落疾不得到明看右隱月岫臺上綠蘿春閒登

不見人每當休暇日著履戴絃巾右琵琶臺清淨當深處虛明向遠開捲簾無俗客應只見雲來右宿雲亭自愛新梅好行尋一徑斜不教人掃石恐損落來花右梅谿山城無別味藥草蕪魚果時有繡衣人同來石上坐右繡衣石榻紫芽連白藥初向嶺頭生自看家人摘尋常觸露行右茶嶺階上一眼泉四邊青石甃惟有護淨僧添瓶將盥漱右上士瓶泉綠酒盈白杯隨流去復回侶知人把處各向面前來右流杯渠累石盤空遠層層

勢不危不知行幾里得到上頭時右盤石磴春塢桃花
發多將野客遊日西殊未散看望酒缸頭右桃塢此
方洞壑聯屬而溫湯洞為最杜光庭錄異記云開州後
倚盛山東枕清水沂江而北三十餘里至溫湯井井有
湯泉在北山上麟德年因雷雨震霹山脚摧裂洞門自
開當門有石鐘自然成形如數千斤鐘大懸身去地二
尺許外象鐘而中實扣之無聲門兩壁有石如金剛力
士之形者數人鐘旁有小徑高六尺已來行二三丈稍

濶有石碑巨龜負之自然而成但無文字而已碑側有巨屏上與頂相連下有一穴側身可入一二尺許自是廣濶中有路徑平坦與常無異路之左右滴乳為石羅列衆形龍鱗鸞鶴頽雲巍山如柱似動似躍乍飛乍顧千形萬態不可殫紀僅一里許傍竦蓮臺周迴數步高三四丈層級重疊皆可攀躋旋生石乳如臂如指者以燭照之通透瑩徹隨折脆斷及出洞門外得風皆白石矣自臺側三四十步有蓮花羅布於地旁有甘泉

水色溫白遊洞者烹茗於此前有橫溪湍波甚急其聲
喧洶流出洞外溪上有橋長二三丈濶一丈許非石非
土功甚宏壯過橋得黃土坡高四五丈道徑險滑行者
累息方至其頂坡上有巨堂四壁平淨中高數丈壁上
皆有遊山之人題記年月堂之極處曲角有一穴高四
五尺廣三四尺去下丈餘躋攀莫及相傳云昔有遊人
攀緣而入累月之後出于巫山洞中自後無復敢入者

大寧縣

水經註巫溪水又逕北井縣西東轉歷其縣北井南有鹽井井在縣北故縣名北井建平一郡之所資也鹽水下通巫溪溪水是兼鹽水之稱矣 勝覽云寶山在大寧監北十七里半山有穴如瀑泉即鹹泉也山有牡丹芍藥蘭蕙雜花卉圖經云一泉之利足以奔走四方者此矣知監正子申大寧志序云一溪前陳可濯可泐衆峰巉絕如削如畫亦峽郡之桃源也 紀勝云觀音巖在監治東鳳凰山郡守張孝芳愛其類湘中山水暇日

窮討得月窟雲巖釣雪玉環浮玉寶華之勝又云距城
二里兩江合處中有石岩峙如門高二三丈溪流噴如
瀑布謂之南洲鹽官孔嗣宗春日與客泛舟飲于綠陰
下商民鼓吹隨之其樂不減于蠶市矣 志云二仙洞
去鹽場二里一名王子洞山高百餘丈上下皆削壁惟
一徑寬二尺長四五丈許始達中可丈許凡遊者不敢
下視洞口寬高十餘丈深不可測岩上石文生成千字
水出石筍四時不絕相傳昔有王子採樵見二人圍棋

于此局未終而斧柯已爛其人仰壁畱題而去詩曰仙人洞裏無春秋白雲深處心悠悠爛柯樵子半途客安得乘風駕玉虬千年勝事今朝說一一重重心練結從來流水與高山更有清風共明月王子後不知所終但傳蛻仙骨長丈餘 碑目丁晉公謂夔州移城記云開寶伐蜀師分劔巫而入時灝瀕激射樓船戰艦難進易退步騎自襄州西山裹糧兼行林麓無際澗壑相接不知道路之所從得蜀民詣王師獻書由大寧路直取夔

州平蜀之師實取道於此也景德三年記

大昌縣

水經註云巫溪水源出宣漢縣南逕建平郡之泰昌縣南即大昌也 寰宇記云千頃池在縣西三百六十里波瀾浩渺莫知涯際分為三道一道東流當縣為井源一道西流為雲安縣陽溪一道南流為奉節縣西瀼水杜甫西閣三度期大昌嚴明府同宿不到詩云問子能來宿今疑索故要匣琴虛夜夜手板自朝朝金吼霜

鐘徹花催蠟炬銷早鳧江檻底雙影謾飄飄

建始縣

三國時屬吳之建平郡隋開皇為業州今縣東三十五里有州基山是其處 黃山谷馬上口號呈建始李令云驛亭新似眼波明箐路開如掌樣平誰與長官歌美政風搖松竹是歡聲志云縣西三里有石通洞壁刻涪翁二字蓋山谷曾來遊也 志又云縣西五十里石乳石層疊多生石乳其上置石乳關

欽定四庫全書

蜀中廣記

卷五

蜀中廣記卷二十三

欽定四庫全書

史部

蜀中廣記卷二十四
五

詳校官編修臣翟槐

編修臣程嘉謨覆勘

總校官庶吉士臣何思鈞

校對官學正臣陳木

謄錄舉人臣羅允文

欽定四庫全書

蜀中廣記卷二十四

明 曹學佺 撰

名勝記第二十四

川北道

保寧府一

閬中縣附郭

閬中本秦舊縣張儀伐蜀所置通志云張儀城在城東
二十里郡志云閬中縣東二十里白沙鎮是舊縣治國

初徙入城按此則張儀城即舊縣矣通志云本府城漢末劉璋所築蜀漢巴西守張飛治此增修國初千戶滕貴拓之甃以石是前郡縣不同城也寰宇記云張飛冢在刺史大廳東二十步高一丈九尺碑目閭中有張桓侯與張遼書石刻漢文八分書方輿勝覽云唐魯王靈夔滕王元嬰皆鎮是州以衙宇卑陋遂修飾宏大之擬于宮苑謂之隆苑其後避明皇諱改曰閭苑又云或謂閭苑仙有五城十二樓向但有五城而樓尚闕宋德

之為守乃建碧玉樓於衙城之西南隅亦名十二樓以
成閬苑之勝按杜甫詩嘉陵江色何所似石黛碧玉相
因依樓名取此 通志云東樓跨府城上形製尚古杜
詩層城有高樓制古丹雘存迢迢百餘尺豁達開四門
勝覽云閬州江山奇秀聞天下直前據其會曰南樓
唐滕王元嬰所建也宋太守李獻卿詩云三面江光抱
城郭四圍山勢領烟霞馬鞍嶺上渾如錦繖蓋門前半
是花 通志云會經樓在府治將相坊按華陽國志云

已有將蜀有相後因有閣苑三學士錦屏三狀元之盛
故以將相名之樓元祐中建置經史子集三萬餘卷蘇
軾題額蒲宗孟記 勝覽云整暇堂在府治黃魯直記

又云治平園宋治平初太守朱壽昌築于牙城東文與
可嘗為賦十絕其錦屏閣詩云茂林斑若錦秀巘矗如
屏底處供登覽闌干在杳冥清風臺云無時來見襲有
地更臨高坐客清談起紛紛落塵毛四照亭云畫箔褰
何礙珍叢發已圓願公皆遍賞莫為一隅偏柳橋云接

風誇晚態垂雨怯春寒為問題芳意同誰倚畫欄曲池
云水似珠璫入池如玉磬開臨流唯自適魚鳥莫相猜
明月臺云微稜生海角圓魄到天心共上惟佳客無容
照俗襟三角亭云合棟交生角迴欄互引牙由來因地
勢不是故尖斜花塢云繚繞穿紅萼爛斑踏紫苔誰將
錦步障端為使君開藥欄云玉笋齊抽日金缸競列時
自然俱可愛莫放畫簾垂郎中菴云已築環為堵仍栽
月作床公來時隱几身世在羲皇按通志名宦載壽昌

治閬有異政 寰宇記云閬中山其山四合於郡故曰
閬中名山志云閬中山多仙聖遊集之所志云即錦屏
山在城外嘉陵江南與郡治相對兩峰壁立如屏又名
寶鞍山方輿云山上有瑤寺羅漢畫錦西橋三院後
又築閬峰亭以眺望焉宋陸游詩城中飛閣連危亭處
處軒窗對錦屏涉江親到錦屏上却對城郭如丹青喻
汝礪詩暝色輕烟罩郡城漁舟燈火倒觀星寒山遠水
江村暮自在粧成水墨屏按古咸安志火井令袁天綱

題云此山磨滅英靈乃絕其下為海棠溪多海棠唐張
元寶詩寒食清明倍惘然海棠風落小花鈿如今獨有
孤魂在半落嘉陵半錦川 李膺益州記云閬中盤龍
山南有一石長四十丈高五尺當中有戶有門若人之
掩閉古老以為玉女房通志云在城東三里望如蟠龍
之狀後魏盤龍郡以此山名唐貞觀中侯氣者言西南
千里外有王氣太宗令人入蜀次閬中果見山氣葱蔚
後鑿破山脈水流如血今號鋸山咸亨初曾徙閬中縣

于此即今之鋸山關也志又云蟠龍山前袁天綱嘗築
臺于此以占天象 寰宇記云仙穴山在縣東北十里
周地圖云靈山峯多雜樹昔蜀王驚靈登此因名靈山
山東南隅有玉女擣練石頂有泉常清冽洞穴懸絕微
有一小徑通天寶六年敕改為仙穴山志云一峰峭拔
介宋江嘉陵之間上有驚靈墓元稹八月六日與僧如
展前松滋主簿韋戴同游碧澗寺賦得扉字引云寺臨
蜀江內有碧澗穿注兩廊又有龍女洞能興雲雨詩中

噴字以平聲韻詩云空濶長江礙鐵園高低竹樹倚巖
扉穿廊玉澗噴紅旭湧塔金輪接翠微草引風輕馴虎
睡洞驅雲入毒龍歸他生莫忘靈山別滿壁人名後會
稀 玉臺山在城北七里杜詩閬州城北玉臺山有滕
王亭杜詩君王臺榭枕巴山萬丈仙梯尚可攀即此地
後有滕王墓古碑云閬之第四景為頤神石洞洞虛雙
拱密邇玉臺昔滕王建亭于此古人詩文隱隱可辨
勝覽云東崑在城東有寺鑿山為崑 西崑在城西有

奪錦亭與錦屏山相對陸務觀詩奪錦軒中醉倚欄錦
屏蒼翠插雲端平生不喜言爭奪付與游人自在看

南宮在城南有大像山乃唐高士安隱居之所志云一
名台星宮陳堯叟兄弟讀書于此有捧研亭輿地碑目
云天聖九年本路運使司馬池來遊子光侍末云君實
捧研勾龍亶請以捧研名亭北宮在城北有繖蓋山
高僧宣什住持乃城中開元寺衲也謂之東寺即元稹
題樂天詩于壁及文同寄詠澤師竹軒處矣什公博通

經典魯王出鎮表而異之後居繖子山山上無水以杖
叩岩浩然泉湧今為卓錫泉 喻汝礪漱玉巖記云自
古常言天不負人吾初不甚信曩游太學不啻六千三
百日知古所謂屈原賈誼揚雄韓愈柳宗元輩亦頗識
其面目及得一第則枯冷羞澁幾笑破人口比來閬中
持手板謁上官奔走匍匐作主簿少府模樣燕居作樂
則搖口吻弄語言以佞貴人而覓所謂舉狀者嗟乎其
局促如此則天果不負人邪然飽聞閬奇山川而賢士

大夫最多亦復把酒自慰一日登錦屏拏舟嘉陵江步
至占星巖徘徊縱觀倚老松卧怪石往往摩腹一咲然
是三境之遊須廢吾一日糧吾不得與女旦暮相從也
惟母邱氏漱玉巖近在牆壁外乘興步履從小奚奴直
謁主人脫衣散髮坐巖腹酌酒賦詩相與作物外笑樂
酒醉發狂即呼天大叫曰天乎真不負喻汝礪矣吾常
謂富貴之士不能放意於江山松竹之樂而山川怪奇
烟雲竹石詩酒風月唯遺逸未遇之人始得兼而有之

故天地間雄偉不凡之處天所以資賢人而舒其憂愁
之思者也吾零落荒山鬱鬱無聊賴有錦屏嘉陵之雄
偉占星漱玉之勝槩所謂閬之四奇者吾皆得而有之
他日解官視吾破囊無復新井縣一物駢老髯獨負四
物以歸朋游故舊從吾覓閬中土物吾則與之飲酒取
吾詩而歌之則是四景者不移足而在几席間矣通
志云文城山在城東三十里峰巒聳列林木蔥蒨一峰
拔出名玄都壇張道陵授符籙之所寰宇記云天目

山在治東界一名天溪洞葛仙公修道之所赤烏七年
勅置集靈觀先天二年改名天目觀中和二年改名福
唐觀郡志云天目山在城東五十里唐杜光庭詩盤空
躡翠到山巔竹殿雲樓勢逼天古洞草深微有路舊碑
文滅不知年八州物象通簷外萬里烟霞在目前自是
人間輕舉地何須蓬島訪真仙又云曾隨雲水此山遊
行盡層峰更上樓九日登臨須有意七年岐路亦堪愁
樹紅樹碧高低影烟淡烟濃遠近秋暫爇爐香不須去

佇陪天仗入神州 寰宇記云嘉陵水一名西漢水又
名閬中水周地圖云水源出秦州嘉陵因名嘉陵經閬
中即閬中水又云閬中水亦曰渝水譙周三巴記云閬
中有渝水寶銳氣喜舞漢高祖樂其猛銳數觀其舞使
樂人習之所謂巴渝舞也路史云太昊伏羲氏母華胥
居于華胥之渚孕十有二歲而降神生于仇夷長于起
城註云所都國有華胥之淵乃閬中渝水地也 通志
云宋江源出漢中府舊廣縣經蒼溪縣東流入嘉陵有

白水源出階州亂山中至昭化縣北合嘉陵唐鄭谷詩
蒼蒼白水下嘉陵是也漢地里志縣有彭道將池東西
二里南北約五里文緯書識云巴西郡治有彭池大澤
四夷述云城西南十里有郭池周約五十畝勝覽云彭
池即今之南池也郭池即魚池也二地與漢志相符遁
甲開山圖註云仇夷山四面絕立與彭池成紀皆西土
是伏羲生處仇夷即仇池成起即成紀二字通用南
池有漢高祖廟杜詩崢嶸巴閬間所向盡山谷安知有

蒼池萬頃浸坤軸劍南詩藁云唐長慶中南池新亭碑
在漢高帝廟側 寰宇記云零星池在縣西北四里益
部耆舊傳趙瑤為閬中令時西州遭旱瑤率掾吏齋戒
於零星池歸咎自責稽首流血應時大雨 侯鯖錄云
閬州有三雅池昔有人于此池得三銅器狀如杯盞上
各有篆字一曰伯雅二曰仲雅三曰季雅按魏文典論
云靈帝末斗酒直萬金劉表一子好飲乃製三爵大曰
伯雅注一斗次曰仲雅注七升小曰季雅注五升今池

所得乃劉氏酒器也 通志云城東百廿里有譙玄廟

漢書玄字君黃閬中人少好學能談春秋成帝時拜議郎歷奉谷令後舉繡衣使者王莽居攝易姓名竄歸公孫述僭號連聘不起予毒藥將服之其子瑛盡捐家貲錢贖建武十一年卒光武敕所在還玄家財策詔本郡祠以中牢 古碑云汝南令神道闕在閬中縣末著人代郡守張晦辨云於東面得隸字十有二缺不可識有七 輿地紀勝云唐貞觀碑在閬州太霄觀其石光瑩

前後可鑒號透明碑 本志唐漢州刺史房琯墓碑在
縣城外杜詩他鄉復行役駐馬別孤墳近淚無乾土低
空有斷雲 碑目云唐道襲墓碑在城中報恩寺按蜀
檇机王建以道襲為閬中刺史改其鄉為烈士鄉 又
云崔善德政碑在衙門東按善武成中為刺史有惠政
民人懷之

蒼溪縣

蒼溪於閬中為上游即臨嘉陵水也江岷有放船亭杜

詩送客蒼溪縣山寒雨不開只愁騎馬滑故作放船回
後人因以名亭 元稹蒼溪縣寄揚州兄弟詩蒼溪縣

下嘉陵水入峽穿江到海流憑仗鯉魚將遠信鴈回時
節到揚州劉滄宿蒼谿館詩孤館門開對碧岑竹牕燈
下聽猿吟巴山夜雨別離夢秦塞舊山迢遞心滿地莓
苔生近水幾株楊柳自成陰空思知己隔雲嶺鄉路獨
歸春草深文同少泊蒼溪山寺詩正午風色高遂泊蒼
溪縣層崖抱林木有寺藏蔥蒨出船步危磴陰密頗繁

轉上到金僊家緣空列臺殿修篁掛懸溜坐覺炎暑變
老僧晚經論言語何貫穿引我上高閣闌干俯江面寥
寥百里內山水盡奇觀誰謂羈旅中所見皆所願汀洲
白鳥聚井邑清烟散樂此暮忘歸疎鐘起岩畔徙倚下
松門尚怪舟人喚 舊治在曲肘川去縣一里後周所
設也源出玉女山東南流入嘉陵江曲折如肘 其近
山有小錦屏與錦屏相似其稍遠者縣南三十里為大
獲山天池浸其中宋江環遶其下石城四周淳祐間余

玠徙閬州治于此又遠之東八十五里有方山遠望如
几案古方州城也宋嚴大猷居此因以方山名集矣

其著者東南三十五里有雲臺山寰宇記云一名天柱
山高四百丈上方百里有魚池宜五穀無惡毒可度灾
周地圖云漢末張道陵在此學道使弟子王長趙昇投
身絕壑以取仙桃長等七試已訖九丹遂成郡國志曰
雲臺山天柱巖下有一桃樹高五尺皮是桃心肉似栢
張道陵與王良趙昇試法于此樹四百餘年不朽小碑

記之志云山有洞四曰麻姑芙蓉平仙峻仙巖二曰松
根蟠桃池二曰浴丹玉魚山多榕栢大者空中可坐數
人道經云永壽二年重九日道陵將諸品秘籙斬邪二
劍玉冊玉印授其長子衡乃與夫人雍氏登峰絕頂白
日昇天時百二十三歲晉顧長康畫雲臺山記見畫苑
碑目云唐元稹謫通州司馬曾遊雲臺山書行記于山
之鐘樓枋上宋之問送田道士使蜀投龍詩云風馭忽
泠然雲臺路幾千蜀門峰勢斷巴字水形連人隔壺中

地龍遊洞裏天願言迴馭日圖畫彼山川馬戴寄雲臺
觀田秀才云雪壓松枝拂石窻幽人獨坐鶴成雙晚來
漱齒敲冰渚閒讀僊書倚翠幢宋祁西州猿藁云予昔
遊雲臺觀謁希夷先生陳搏祠堂緬想其人今追作此
詩仙館三峰下年華百歲中夢休孤蝶往蛻在一蟬空
藥笈微言秘霄晨浩氣通丹遺舐後鼎林遣御餘風市
霧沉荒白飡霞委暗紅岷峨有歸約飛步與誰同元廖
寥蜀望詩雲臺突出衆山低小徑縈紆上石梯古寺獨

存人寂寂斷碑惟覆草萋萋滿空香散春蘭綻萬壑烟
生曉樹迷為愛其間風景好登臨幾度杖青藜 志云
蒼溪簿金極治道得石塚遺骸尚存有石銘云歲月不
須論車塵擁石門若逢金主簿移我上高原迺改葬之
相沿為金主簿墓不著年代

南部縣

南部本充國地漢末徙巴西郡于閬中有充國城在馬
竇宇記云即今新井縣東北二十八里充國故城是也

李雄亂後荒廢 唐書趙彥昭舉進士少豪邁風骨秀

爽嘗調南部尉與郭元振薛稷善往來吟詠不絕 新

井西水二廢縣皆接閬中通志云西水河在南部三十

五里源出龍州後周西水縣以此名也 勝覽云蘭登

山在新井縣東二十里相傳嚴君平隱居于此有朝遊

蓬漢暮宿蘭登之句三面峻絕俯臨西江 本志唐開

元中何渙為殿中侍御史知名家于西水明皇賜其鄉

為栢臺鄉 又云新井縣有二龍里唐任畹任疇之所

居也姚合送任畹及第歸蜀詩子規啼欲死君聽固無
愁闕下聲名出鄉中意氣遊東川橫劍閣南斗近刀州
神聖題前字千人看不休 有崑曰靈雲唐蒲景珣家
於此岩前為居室至者不知其為崑也在蟠龍山下有
洞人入之履地作鐘聲李燾詩云路轉層岡十里餘武
陵傳者亦難如昔年煉藥仙人室今日餐霞道士居洞
外蟠桃開錦繡巖前石溜漱瓊琚猗與靈氣為時雨可
惜圖經闕不書 有樓曰清風宋蒲宗孟左丞建其家

多書初此樓以貯之嘗作訓戒子弟曰寒可無衣饑可
無食書不可一日失 有院曰慈光冠平仲過新井慈

光院看海棠詩云暄風花雜滿欄香盡日幽吟歎異常
翻笑牡丹虛得地玉階開落對君王 縣東南與蓬州

相接三十里為禹跡山志云禹治水所經也山頂平行
有小石泉鑿石為像層樓覆之宋紹興間何汝賢有禹
跡山院記 五十里為離堆山即古新政縣地蜀三離
堆之一也唐顏真卿謫蓬州長史來遊作磨崖記謂此

山斗入嘉陵江直上數百尺形勝縮矗上崢嶸而下洄
湫不與衆山相聯屬故曰離堆志云東西有石堂故京
兆尹鮮于仲通與弟叔明所鑿堂北有盤石石上有九
曲流杯池 歐陽修集古錄云新政縣磨厓記唐顏真
卿撰併書以寶應年立碑有魯公祠宋馬存記云上元
中顏真卿為建州長史過新政作離堆記四百餘言書
而刻之石壁上字徑三寸雖頽壞剝裂之餘而典刑具
在使人凜然元符三年予友強叔來尹是邑始為公作

祠堂于其側求予文以為記 輿地紀勝云新政縣大
歷碑在江岍之次顏魯公書碑傍有佛老孔子像像傍
又有二小記皆大歷中物按此所謂三教院也碑目云
鮮于氏兩神道碑一在三教院厓上一在墓田其文與
書皆出顏魯公又有獎諭仲通碑亦在墓田 志云新
政縣十里對江報本院鮮于仲通叔明兄弟葬其傍有
韓雲卿所撰墓碑猶存其字儼然無剝落 按鮮于之
後宋時皆家于此景祐間鮮于侁登第為轉運判官值

行新法而民不擾司馬溫公稱之曰子駿福星也又有
十世孫元卿同知縣范百祿州掾任昱觀魯公刻題名
其與離堆相近曰仙鳳山志云在縣南五十里上有
七曲臺始落成時地上土痕成仙鳳二字大數丈碑
目云宋新政令裴迪唐丞相晉公之後也因家于此尚
收得晉公像及累任告身撰真贊並存

廣元縣

廣元蜀口古今所必爭之地宋寧武軍志云前接關表

後據劍門烏奴山祠堂記云郡壤故錯羌氏與上庸百濮微髳彭盧俱寔一大都會也元改為廣元路碑云在易曰廣大配天地在春秋謂一為元以示張大之意

縣治在烏奴山東晉壽綿谷二縣皆其處志云烏奴山一名烏龍山在廣元西二里嘉陵江岸峭壁如削有洞不可上昔李烏奴于此修寺因名按北史王元邈傳亡命李烏奴作亂梁部陷白馬戍玄邈率東從七八百人討之不克慮不自保乃使人偽降烏奴告之曰王使

君兵衆羸弱棄使妾於城內攜愛妾二人去已數日矣
烏奴喜輕兵襲州城元邈設伏擊破之烏奴挺身走太
祖聞之曰元邈果不負吾意遇也此烏奴之始矣 今
之臨清門川主廟即唐皇澤寺也九域志云利州都督
武士護生武后于此因賜寺刻其真容李商隱利州江
潭詩註感孕金輪乃武則天事也詩云神劍飛來不是
銷碧潭珍重駐蘭橈自攜明月移燈疾欲就行雲散錦
遙河伯軒牕通貝闕水官帷箔卷冰綃他時燕脯無人

寄雨滿空城蕙葉彫葢后母感溉龍而有孕也 縣北

即黎州城梁大同置後魏之益州隋之義成郡皆理于

此宋唐庚詩黎州酒貴如金汁解盡寒衣纔一吸 南

有刀環山益州記曰葭萌縣南十里有刀環山赤銅水

出焉 東即望鄉臺去縣三里武元衡送柳郎中詩望

鄉臺下秦人去矣 其見諸經傳者曰嶠冢山原為漾

水即西漢水也曰潛水出綿谷之龍門山禹貢岷嶠既

藝沱潛既道漢書注云潛水從漢中沔陽縣南流至梓

潼漢壽縣入穴中通岡山下西南潛出今名複水舊說
即禹貢潛水也 曰脢山為平蜀廢縣即利州衛治史
記脢侯爵脢山出舞衣 曰丙穴地在沔水之南出魚
肥美詩疏云沔南丙穴是也 其見諸雜記者曰白馬
山寰宇記云張平子仕漢為侍中少時學業于此 曰
明月峽晏殊類要云三峽謂巫峽巴峽明月峽也惟明
月峽乃在此郡界 曰滌溪事林廣記云天下十二溪有
上真廟為聖真居之滌溪其一也在利州又云漢江水

帝廟為真龍宮在漢坪石 其驛路有曰問津志云昔
孔明行師于此問津故名按即古嘉陵驛也在治西一
里後魏嘉川縣設馬唐姚鵠嘉川驛樓晚望詩樓壓寒
江上開簾對翠微斜陽諸嶺暮古渡一僧歸迥迥雲衝
起汀遙鳥背飛誰言坐多倦目極自忘機文同嘉川道
中寄周正孺詩云草木春深處山川雨過時清佳常滿
目衰倦敢忘詩好尚舊若此飄零今比誰爭如畫堂上
日日聽新詞又嘉川驛詩云嘉川之西過新棧幾里朱

欄繞青壁我行落月尚在水水影照人襟袖白繁英雜
綴修蔓上綠錦纈帶垂百尺清香滿馬去未休賴爾春
風慰行客 鮮于侁為利州轉運使文與可有寄子駿
運使詩云西鄉巴嶺下嶮道入孱顏使騎到荒驛野禽
啼亂山問民青靄裏訪古白雲間幾日南城路新詩滿
軸還有靈溪寺在嘉川縣中碑目黃山谷紀行碑在嘉
川縣靈溪寺是矣運使子駿題以五言曰桐軒竹軒栢
軒巽堂山齋燕閒亭會景堂寶峰亭凡八景其詩略云

金城環雉堞雲屋瞰闌闌雙林聳江右九隴覩天外按
金城縣北四里金山是也滌溪環其右九隴者去邑西
二十里山環九十九峰如劍戟之排列昔漢祖駐蹕于
此有漢王寨其時司馬君實范景仁文與可蘇子由皆
和有詩溫公年譜隨其父利州轉運使遊此有祠在馬
南去有望喜驛今廢元稹詩云滿眼文書堆案邊眼
昏侵得暫時眠子規驚覺燈又滅一道月光橫枕邊李
義山詩云嘉陵江水此東流望喜樓中憶閬州若到閬

州還起海閬州應更有高樓其二云千里嘉陵江水色
含烟帶月碧於藍今朝相送東流後猶自驅車更向南
北為棧閣道劉禹錫山南西道新修驛路記云我之
提封距右扶風觸劍閣千一百里自散關抵褒城次舍
十有五自褒而南踰利州至于劍門十有七道塗次舍
可見于此又云棧閣凌虛下臨鈇研層崖峭絕朽木絙
鐵因而廣之限以鉤闌狹經深陁從而拓之方駕從容
棧閣之制亦可想也歐陽詹棧道銘斜根玉壘旁綴青

泥總庸蜀之道塗統岐雍之康莊 其最險者為石欄
橋方輿云自城北至大安軍界管橋欄閣共萬五千三
百六十一間惟石欄龍洞二閣著名馮鈐幹田云其他
閣道雖險然在山腰亦微有徑可以增置閣道惟此
閣石壁斗立虛鑿石竅而架木其上比他處極險沈佺
期過蜀龍門閣詩龍門非禹鑿詭怪乃天功西南出巴峽
不與衆山同長竇亘五里宛轉復嵌空伏湍煦潛石瀑
水生輪風流水無晝夜噴薄龍門中潭河勢不測藻葩

垂彩虹我行當季月烟景共春融江關勤亦甚巖岬意
難窮誓將息機事煉藥此山東岑參赴犍為經龍閣道
詩云側逕轉月壁危梁透滄波汗流出鳥道膽碎窺龍
窩驂閣二溪谷歸雲網松蘿屢聞羌兒笛厭聽巴童歌江

路險復永夢魂愁更多聖主幸典郡不敢嫌岷峩杜甫
龍門閣詩清江下龍門絕壁無尺土長風駕高浪浩浩
自太古危塗中縈盤仰望垂線纓滑石欹誰鑿浮梁梟
相拄目眩隕雜花頭風吹過雨百年不敢料一墜那得

取本志北十里千佛崖即古龍門閣先是懸崖架木作棧而行後鑿石為千佛像成通衢矣 唐蘇頲利州北題

佛龕記云吾見夫山連岷嶓水合江沱山兮水兮路窮險鬱南望兮此情多吾又見像法住世于巖之阿百千萬億兮相觀我載琢載追兮吾匪他伊古昔兮焦呂不懼必忠信兮艱危若何故吾因空而即有孰不迴向以檀那行矣些陽景頽兮翠改色陰風起兮自增波 小許公利州北佛龕前重于去歲題處作詩云重巖載看

美分塔起層標蜀守經塗處巴人作禮朝地疑三界出
空是六塵銷卧石鋪蒼蘚行膝覆綠條歲年書有記非
為學題橋 按龍門山亦云葱嶺山梁州記云葱嶺有
石穴高數十丈其狀如門號為龍門又云山東南有玉
女山山上有一石穴中若房宇有玉女八人不出穴前
修竹下有石壇風來動竹掃壇如簾又云山北有燕子
谷中有好磐石即志所稱石燕山 又北三十里有大
小漫天嶺極高峻羅隱詩云西去休言蜀道難此中危

險已多端到頭未曾蒼蒼色爭得禁他兩度漫高駢詩
云萬水千山音信稀空勞魂夢到京畿漫天嶺上頻回
首不見虞封淚滿衣嶺上有寺元稹題漫天嶺智藏師
蘭若云僧臨大道閱浮生來往憧憧利與名二十八年
何限客不曾閒見一人行又漫天嶺贈僧詩云五上兩
漫天因師懺業緣漫天無盡日浮世有窮年 又北五
十里為朝天嶺路徑險絕方輿云舊路在朝天峽棧閣
後開此路人甚便之文與可朝天嶺詩嶺若畫屏隨峽

勢水如衣帶轉崑陰按今設有沙河驛亦沿江行其曰
朝天者水驛也 四十里為潭毒關志云潭下淵底有
一鉄索見則兵動向有御前軍屯此以捍蜀口 又二
十里為神宣驛即古籌筆驛也相傳武侯出師駐此唐
杜牧詩永安宮受詔籌筆驛沉思李義山詩魚鳥猶疑
畏簡書風雲長為護儲胥是也神宣驛者世傳二郎神
持劍逐蹇龍過此因名 又八十里為九井驛志云琳
瑯九井以琳瑯山出泉九處濺石若琳瑯也碑目云九

井灘舊時有蝦蟆青牛青塹三巨石伏水為舟楫害淳
熙間利路提刑張曩容募降人冉得者治械如桔槔狀
治鉄為杵重千五百斤拋擲半空而下三石俱碎化險
為夷有碑刻剝落其上為七盤關乃秦蜀分界處唐沈
佺期詩獨遊千里外高卧七盤西山月臨窻近天河入
戶低後人因立為天河閣顧非熊天河閣即事云萬壑
褒中路何層不架虛徑雲和棧起樵徑帶畬餘崑嶺牽
垂果滿禽接躍魚相逢維艇處塢裏有人居

昭化縣

葭萌地入廣元而其縣理在漢為漢壽晉為晉壽者則
屬昭化本志云縣北百八十里施店驛即古葭萌驛驛
即故縣址也未通保寧路時自秦入蜀罔有不由昭化
者唐張說再使蜀道詩云眇眇葭萌道蒼蒼褒斜谷煙
霞爭晦深雲山共重複古來風塵子同眩望鄉目芸閣
有儒生輶車倦馳逐青春客岷嶺白露搖江服歲月鎮
羈孤山川俄反覆魚游戀深水鳥遷戀喬木如何別親

愛坐去文章國蟋蟀鳴戶庭蠭蛸網琴筑 北接廣元
則龍門石櫃白水景谷之地彼此參錯海內東經云白
水出蜀而東南注江郭景純註水微白濁今在梓潼白
水縣源從臨洮之西傾來經沓中東流通陰平至漢壽
縣入潛梁州記云城西南百八十里白水關即李固解
印綬處也蜀志先主斬楊懷高沛于此 元和郡國志
云景谷縣西南二十五里有白馬山孔明造木牛流馬
處 南接劍門則有大劍城元和志云即秦張儀司馬

錯伐蜀所由路又謂之石牛道有小劍城注水經云小劍城去大劍城三十里連山絕險飛閣通衢故謂之劍閣也是唐益昌縣地矣又有小劍故城在益昌縣西南五十里其山截野橫天犇峰倒地挾楚包漢呀秦擁蜀劉先主以閣道至險又置閣尉焉岑參和杜相公發益昌詩云相國臨戎別帝京擁麾持節遠橫行朝登劍閣雲隨馬夜渡巴江雨洗兵山花萬朶迎征蓋川柳千條拂去旌暫到蜀城應計日須知明主待持衡利州淳化

帖跋云慶元中四川總領權安節以淳化戲魚帖并釋
文重刻石劍門寺內石今已不存權總江州德安人其
家猶有當時墨本甚多釋文字畫較臨江帖為稍大云
劍領中有馬鳴閣志云先主使陳戎絕馬鳴閣魏武
聞之喜曰此閣過漢中之陰平乃咽喉之要路 又有

白衛嶺唐明皇幸蜀過此見玄元皇帝騎白衛而下示
取祿山之兆遂封嶺神白衛公唐詩紀事載明皇幸蜀
登白衛嶺眺覽良久歌李嶠山川滿目淚沾衣富貴榮

華能幾時不見只今汾水上惟有年年秋鴈飛詩曰李
嶠真才子也 有桔栢潭今昭化驛是驛有古栢土人
呼為桔栢故以名潭志云桔栢渡舊傳其津有二魚負
舟往往沉溺一道士求渡操舟者難之道人云吾乃葛
仙翁命取石書符令舟人佩之至中流二魚果出擲符
水中少頃浪息次日二魚死于龍爪灘下按唐書玄宗
幸蜀次益昌縣渡桔栢江雙魚夾舟而迎從臣以為龍
也杜甫桔栢渡詩云青冥寒江渡駕竹為長橋竿濕煙

漠漠江水風蕭蕭連竿動婀娜征衣颯颯飄飄急流鵝鷀
散絕岸鼉鼉驕西轅自茲異東逝不可要高通荆門路
濶會滄海潮孤光隱顧盼遊子悵寂寥無以洗心胷前
登但山椒

蜀中廣記卷二十四